

浙江文叢

國權

〔第二十三冊〕

浙江出版聯合集團
浙江古籍出版社

浙江文叢

國權

〔第二十三冊〕
卷六十九至卷七十一

〔明〕談遷 著

浙江出版聯合集團
浙江古籍出版社

國權

鹽官談遷孺木著

起崇禎四年

盡崇禎五年六年

辛未崇禎四年

正月乙亥朔上不御殿是日風霾

丙子吏科給事中顏繼祖言故事歲莫祭太廟陪祭官
子初既朔早起午門謝昨文武僅十餘人西班少一御
史朋友之饋非祭肉不拜友貺如此况君賜乎陪祭則
印纍綬若謝昨則落落晨星臣所不解也上切責諸臣

宥之

刑科給事中吳執御言加派不可 且云近日議者皆
憑臆而作繆語推者皆隨聲而循當事倘以皇上日月
照臨其上復賜宸斷以行諸臣誰敢不竭其肝膽即大
臣誰敢執私意以熒惑乎上責其回奏

己卯夜盜陷保安副總兵張應昌擊賊斬百七十三級
神一元死第一魁領其衆

庚辰刑科給事中吳執御言掣籤之法創於冢臣孫丕
揚以探丸之智為挈瓶之守在當日公行之尚失政體
況近日假公以濟其私乎特請宸斷罷之此治吏第一

義也若撫按所舉卓異諸臣乞進之於廷或詢以時政
人才或地方利病俾據實口對因察其賢否才庸而甄
別焉則皇上之目遇賢於諸臣之耳食百倍矣命部議
辛巳覆試順天貢士俞世灝金允治高岱岱除名

壬午督師大學士孫承宗出關由前屯寧遠抵松錦庚
寅由三道關歷石門燕河偏關三協十二路由石塘路
過平谷經盤山入薊州而還條上邊事曰先任封疆大
臣曰精擇八部大帥曰遠鎮備戰曰合薊遠鎮守曰復
城曰防插漢上善之於是有大凌河之役議脩築兵部
尚書梁廷棟實主之後廷棟去朝議撤工承宗曰且未

撤兵敵至而戰上策也據見糧以守中策也委空城疲敵寇下策也

癸未流寇掠平陽

甲申吳執御復奏臣見戶部題覆云今日生財無踰加派夫古今生財雖曰多端有以賦民為生財者乎所謂馮臆而作謬語也去年十一月兩廣總督關吏部會推尹同臯奉旨回話借墨縑以解當日皆銓臣執拘主推而預推諸臣唯唯命所謂隨聲以徇當事者也若此二事私乎非私乎熒惑有其漸矣上責其支飾

巡撫河南右僉都御史郝土膏罷

右中允蕪編脩黃道周奏救錢龍錫調外初逆璫一案
諸奸憾龍錫欲借袁崇煥亦起一逆案以相報因龍錫
以羅及諸臣周延儒溫體仁實主之欲發自兵部而尚
書梁廷棟不敢任又上英斷不能遽起大獄也至是道
周䟽上延儒意稍解

己丑顏繼祖乞武進士未授秩者給銜盡東征聽遠東
登萊二撫調遣不許

庚寅王嘉孕渡河掠菜園溝副總兵曹文詔擊却之斬
三百二十六級

甲午進午門大朝鼓

丙申給事中吳執御復言理財加派原不得已之心而姑行之然未有不即為停止者至捐助搜括二者尤難為訓上以加派原不累貧捐助聽之好義惟搜括滋奸若得良有司奉行撫按稽察亦豈至病民乎

諭曰陝西屢報饑荒小民失業甚至迫而從賊自罹鋒刃誰非赤子顛連若此今特發十萬金命御史前去酌被災處次第賑給仍曉諭愚民即已被脅從誤入賊黨若肯歸正即為良民嘉與維新一體收恤

己亥遂命御史吳姓賑陝西饑民招撫流盜余大成何應瑞為右僉都御史巡撫山東河南

戶科給事中杜三策奏臣於三年六月抵閩造船委中
軍楊鍾會於廣南買物料出洋被刼訴於海道下廣州
知府徐在中訊其真偽而囚之且杖死以快賊乞嚴究
在中等從之命逮在中下法司論死

罷總兵杜文煥以去冬在延川縱部將李重榮殺鄉民
曹孟孝等男婦百九十九人知縣王道行呈驗於按察
使李天經御史吳桂劾之

內監鄧文詔訐奏薊遼總督曹文衡

上召輔臣九卿吏科都給事中劉漢儒河南道御史喻
思恂及各省監司於文華殿召浙江按察副史周汝弼

問浙閩相連海寇備禦之策對曰去秋寇掠海上五日即去問江西右布政使何應瑞按察使僉事王繼夔爾省派宗祿何以不報應瑞曰江西山多田少而且瘠撫按查覈有司尚未報耳問湖廣右布政使杜詩按察使范中彥爾楚去夏民變樹旗事詩曰樹旗之後地方仍安上曰須覈之以杜來患問福建左右布政使吳暘陸之祺海寇備禦若何暘曰海寇與陸寇不同故權撫之但官兵徂撫為安賊又因撫益恣故數年未息也上曰前撫李魁奇何又殺之暘曰魁奇非鄭芝龍比即撫不為我用以其要挾反側貽害地方今鍾斌雖撫知不就

撫上問實計安在之祺曰海上官兵肯出死力有司團練鄉兵多設火器勦之不難問河南左右布政使楊公翰賈鴻洙以收稅耗重宜叅有司鴻洙曰近奉嚴旨稍革其弊問廣東左右布政使陳應元焦源溥曰爾省負宣大邊餉數十萬何也應元曰近已解納上曰宣大重鎮兵餉急需可速完也問山西按察使杜喬林流寇事曰寇在平陽或在河曲近聞漸渡河去惟河曲尚梗須大創之但兵寡餉乏耳上曰前言寇平何尚阻也曰山陝隔河突去突來故河曲被困問河曲之陷曰賊未嘗攻失於內應問導賊何人喬林曰大抵饑民為之今不

早圖有誤國事問陝西叅政劉嘉遇以流寇曰流寇由
兵餉不足故難勦耳上曰前報寇平何又橫也曰寇見
官兵即散退復嘯聚上曰寇亦我赤子宜撫之曰今正
用撫上曰前王子順既降何又殺之曰雖撫仍掠宜其
僂也上曰若然何不於未撫之前殺之乎曰臣時未任
問此寇出何地曰本延綏逃兵臣十一月十二日入覲
聞初六日總兵賀虎臣殺賊六百餘總兵杜文煥殺二
百餘問近日何如曰一在延安一在雲岩宜川上凝思
久之命退問廣東布政使陸問禮按察使孫朝肅以問
禮已陞南贛巡撫上曰南贛多盜若何對曰行保甲練

兵士庶幾弭盜上曰須實劾空言何為問海寇若何曰
廣東海寇俱自福建突至舟大而有火器兵船難敵但
守海門勿令登陸則不為害問澳彞利害曰火器可用
人未可信問廣東布政使鄭茂華李守俊以靖江王府
爭繼何也茂華曰靖江憲定王二子履祥祐守俊曰履
祥妻楊氏未娶之先妾曾氏先生子玉哥因不繫奏選
之妾故未報生請名其後履祥沒故憲定王請立履祐
為庶子神祖許之令玉哥長矣故爭耳問貴州右布政
使朱芹以安位事曰安位求撫督臣原責四事一擒奢
酋一獻樊虎奢寅妻馬氏子阿甫一令送巡撫王三善

之樞一責削地安位謂既通九驛非得水利地方難供糧馬督撫二臣又不輕予故議未決耳已召各官諭以正已率屬愛養百姓朕自有其顯擢否則不貸各臣退謝又召左都御史閔洪學左副僉都御史張捷高弘圖至諭洪學曰卿初任首疏甚善但未實行御史巡方閔繫甚重巡按賢則守臣皆賢百姓受福若巡按不肖其誤非小屢諭申飭回道考覈何近日俱云稱職上曰今後嚴覈又曰卿與吏部實心任事天下可治乃退

癸卯副總兵曹文詔擊王嘉孕斬三百二十六級

寧武總兵孫顯祖言聞喜稷山賊二十餘萬日勦日益

官兵不過二千奔逐不支乞再發京營或調邊騎五六千夾勦命下兵部委該督專制總督張宗衡以兵餉並乏事竟不行

二月乙巳朔召廷臣於平臺

己酉大學士周延儒何如寵主禮闈

辛亥夜定邊營降丁大譟蓋闕餉五旬各求給散守備張天禮同遊擊馬科卷諭乃安降丁仍逃二百餘人亦前曹文詔所收山西降盜也

壬子總兵賀虎臣杜文煥等合軍圍保安神一魁勾套千餘騎突圍出諸將怯走一魁糾衆數萬劫寧夏都

指揮王英兵潰各道將兵進擊寇棄城南奔

戊午神一魁至慶陽破東關遊擊伍維藩等擊斬五百餘人

己未叅將張全昌以巡撫練國事令邀洛川鄜州之賊至是戰於梁家嶺敗之斬四百六級

庚申戶部告急請帑不許

壬戌四川建昌彝羅羅千餘人作亂

丙寅福建流寇數千自長汀賴坑突犯瑞金縣教諭王

魁春署邑事諭民兵禦卻之擒三十餘人斬四十餘人

寇走福建古城

丁卯刑科給事中吳執御言督學綱紀學校近多徇情
臣謂宜慎擇其人於未任之先責以久任歲貢應勅提
學歲選年壯品純者送廷試錄用老邁即題授冠帶不
必赴京又漢武設太學博士唐制郡縣有學宋制州縣
教授共五十三員我朝遠踰前代郡縣儒官多至四千
餘員名器稍濫竊見順天應天附郭宛平大興上元江
寧四縣總於府學今將各府附郭州縣學俱併府學不
減其廩增附額但以府學教授五人董之各州縣學有
學正教諭加訓導一餘可裁省命下部議

戊辰白貽清為右都御史巡撫甘肅